


Seccion di Clyde Harms

Matrimonio di Nicaulis Aliey y José Escalona

Musiconan di Maracaibo, Bon Amigo di Aruba.



Den un kapel chikito cu ta parti di e compleho Fundación de Niños con Cancer, den presencia di famianan y algun amigo intimo, diabierna 27 di December Nicaulis Aliey y Jose Escalona a intercambia renchi pa declara na otro nan amor sin fin y pidi bendishon di Nos Señor. Nicaulis y José ta bon conocí na Aruba como miembronan di e grupo musical La Cuadra Venezolana cu a toca gratuitamente pa recauda fondo pa Aruba Scholarship Foundation. Nicaulis tambe a toca pa Prinses Laurentien na un restaurant na Playa Linda na fin di aña 2012. Na e servicio eclesiastico, e maestro Max Aliey, un omo di Nicaulis, a trece parti di su famoso orkesta y coro pa e interludionan musical. Cu nan bosnan potente, e cuater cantantenan a zona manera un coro di opera. E grupo di apenas seis musico tabata casi mes impactante cu e ensemble completo di André Rieu. Tocando manera un orkesta sinfonico nan a deleita esnan presente cu musica tradicional di pascu y piezanan sagrado. Entre e musiconan tabata un ruman di Nicaulis cu tambe ta musico profesional.

Despues di e ceremonia na misa, tabatin un almuerzo pa e invitanan caminda naturalmente tabatin hopi amigo musico. Nos

por a topa cu Miguel Gonzales y Juvert Ulacio cu tambe tabata na Aruba cu La Cuadra Venezolana. No tabata tin falta di musica pa baila y e almuerzo 'dantsant' a dura te oranan laat.

Otro siman Nicaulis y José ta biaha pa Lincoln, Nebraska caminda Nicaulis ta trahando riba su doctorado den musica cu un beca completo di Universidad di Nebraska y José lo tuma diferente curso cu lo yud'e den su carera como director di orkesta sinfonica.

Nos ta manda palabranan di felicitacion pa Nicaulis y José pa nan matrimonio y nos ta desea nan hopi exito den nan estudio.

Riba potretnan por mira E grupo aki a toca na e matrimonio. Nan ta parti di e coro y orkesta di Max Aliey. Nicaulis drentando e kapel cu su tata, Dr. Ney Aliey, kende tambe ta un gran musico. Jose y Nicaulis saliendo di misa como Señor y Señora Escalona-Aliey. Mama di Nicaulis ta propone un brindis. Mama di José ta na banda robes. Nicaulis y José cu representacion di Aruba: Milagro y Clyde Harms na man robes, Lilly Prince na man drechi

Por contact Clyde Harms na: clydeharms@yahoo.com

